

四庫全書

集部

欽定四庫全書

跨黿集卷二十三

宋 李新 撰

書

上許運使書

某少學書未知用筆法便謂古人削柎裹糗盜寰海之
虛名臨池柿葉費汗青之餘力毫童十年碑下三宿勤
則有之拙亦甚矣婉若銀鈎飄如驚鴻微濃踈瘦自我
作古使為之不已則今日可筮米元章李致堯之列學

書不成去學畫操觚舐墨解衣盤礴十日一水五日一
石丹青雨露化洛陽之春江湖平遠發瀟湘之興若為
之不已則今日突過賀真張顏之右少也多病九折成
醫味黃帝之靈樞繹岐伯之素問於是訂浮沈滑瀉以
分陰陽迹陰陽以較虛實琅玕榆葉指下有自得之狀
張弓操帶意外無可傳之法若為之不已則今日秦介
曹應端是流輩少也不羈意習音聲夜月一笛有牛渚
之風流胡牀三弄得晉人之襟韻方且求陰山之黍嶰

谷之管以起黃鍾之律以攷子聲之妙使澌鐘牛鐸盡
入制作儀鳳舞獸行書簡編若為之不已則今日司樂
協律正堪備員回念太極殿榜有髮白之驚春苑池鳥
有汗流之辱巫咸和緩與卜祝為伍則康伯不如貨藥
都市鄭譯阮咸雜工師並進則安道不為王門伶人故
退而稽古以是得官凡十八年而官不加進算計課効
不如前四事之速奈何底突狂見得罪流落閉居八年
寒乞頗堪忍方崇寧大觀之政比隆三代周官之詳講

於太平芄芄棫樸成新楨之材青青子衿入俊造之域
以至書畫亦有學醫有師樂有司某於此時曾無一長
以竊升斗之祿他日能事中道而畫私自惋憤恭惟某
官以儒緣政以文起家卿雲之章昭回蜀天甄收人材
亡有遺逸如某廢錮久溷封部幸朝廷涵容漏泉無邊
例許敘復其自新之志欲滌腸於清無有滓穢涪水在
此某不食言比嘗以繆悠之作為左右贖其言不根於
道而學不到古則請復少年之業以求售脫謂可教則

盡弃其學而學焉

上張丞相書

某嘗聞百千法門本無差別河沙妙用豈有異同人與
非人性相如一衆生錯亂為境所惑一漚起處目為全
潮故於是中觀大觀小苟能圓融和會不與物運眊彼
與我等則凡聖情盡體露真常泯絕妄緣即如如佛恭
惟相公虛光獨耀覺性具存迥脫根塵了絕知見凡所
謂雕牆潭府高牙大纛呵前擁後妓奴舞僮使令便辟

俯伏趨走多色伎倆此皆幻相於本來湛靜之體了不
相應既已自利亦欲利他世固無西天多羅識可以前
知而明珠水鏡應物現形自無臬礙且以全蜀千里三
峨之秀九江之清其先騰而上者不知幾萬由旬自漢
到今人材出興晶明奇特迺至算數譬喻所不能及如
王褒子雲之智慧何武相如之辨才君平仲元之行業
譙周子昂之多聞俱得第一彼皆具正法眼藏得涅槃
妙神通運用足以尊主庇民當時之狗監牧守能誦

其賦傳其書力推其人數千百年風誼寥落借如有相
如賦人亦不識其字有子雲書人亦不貴其學士之志
節高於須彌者化為微塵氣魄斷盡歷劫伽沙劫歎惜
未有窮已也重念吾屬識性有限人倫藻鑑如郭有道
裴行儉者才一二數而宗門印證何其多也六祖謂讓
曰他日足下出一馬駒踏殺天下人其後果有寂子而
龍潭稱德山亦云他日孤峯頂上立吾道在為山稱德
山云將來有把茅蓋頭罵佛罵祖在洞山言雲居云此

子已後千人萬人把不住在黃檗謂臨濟曰汝已後坐斷天下人舌頭在盤山稱普化云此子向後如風狂接人在忠國師稱丹霞云三十年後覓此子也難得在前洞山稱後洞山云此子已後走殺天下人在龍牙謂天台云汝向後自會在片言之發如天中的凡所肯可若九鼎大呂他時云為竟入先料非龍門月旦山公啓事之比其精諦確密過吾屬遠甚是事且置伏念某以言語文字觸突狂見得罪流浪選調洄沈凡二十年其本

有之性雖無成虧幸今僕射相公調贊元化為天人師
策百工盡待鑪錘之賜值遇之難愈於佛出道德嗣似
何啻燈傳爍迦羅眼通身皆是西南之士願備掃門之
役垂手接引宜有半箇人悟無盡妙義直取凡庸授以
梵位似未為過性地可指衣鉢不傳得法無心事不獲
己尺書陳情干冒鈞席某下情無任俯伏戰汗

上劉樞密書

嘗聞東野巨人健嗽而家居踈寒終歲不充惋惋振憤

乃謀自甘口腹度其計決不久長因懸箱金邀致繪者
書圖庖饍之具與古先人物置在肘腋時時泛觀以起
滋味如擇食然於是一飭輒斗粟不厭會有飢王孫過
巨人入其室且欲得一杯羹撐敞腸而巨人方大嚼矜
聽其畫王孫不得已徵之曰東向負鼎而偃僂者為誰
曰伊尹割烹北向跪甌而其意慙懃者為誰曰公孫豆
粥其喜而持鬻者為誰曰執炙獲啗其怒而探湯者為
誰曰染指獲嘗眦目盡裂髮上衝冠者何曰漢壯士樊

噲其机上肉曰彘肩揚眉奮袖搖吻吐詞者何曰晉佳
士陸機其席上珍曰蓴羹巨人復件其右曰此太傅何
曾萬錢食此尚書韋陟擇米飴此張翰鱸膾此王武子
蒸肫尾後一人豐頰而凝脂利牙而頰肥盃盤狼籍有
如倦膏粱者曰此監廚趙稚長王孫曰美哉稚長其樂
無窮語未卒巨人掩卷去王孫恍然若失前箸已而大
醒始恨其流涎咽沫者俱妄也而初至之飢益進他日
入大都鳴鐘之家合食賓客主人擁篲於門延王孫入

羅九鼎於庭下備八珍於堂上惟所擇下筯處而王孫
便然飽其德以歸視從者亡有前日菜色與觀巨人畫
時斬斬有間矣且古語曰求賢如飢渴蓋恐或失之也
先進者其欲逢巨人之畫乎寧其不逢而逢鳴鐘之家
者乎恭惟閣下以盛德夙望為吏師帥為民冠冕為朝
廷羽儀今也入蜀每食不飽窮治羞饌正在士子而西
南之人烹薺擊鮮鮓龍脯麟脰熊蹯熟豹胎求鹽梅市
椒楨以和鯉尾以助猩唇以調露雞臠螭日夜盡走閣

下之門如某疎寒特負圖畫以進竟無補公饑

上劉運使書

某不佞自念有生九千三百日無半口氣向人出好音
聲得一第例蠹太倉一石五斗米而田舍子門戶庠陋
不當在人牙頰容頭過身退避訶諄如腐鼠敗草逐溘
埃以沒分定故也重念當道諸公日洗冰鑑拔去聲援
以一味至公笔擇西南士人某何苦自廢垂塌羽翮使
腹背之毛爭先呈露是亦天地間一物可惜數耳某嘗

聞馬得之驕驕禽得之駿驥劍得之湛盧草得之杜蘅
世之人不問嗜與不嗜其陽氣見於眉宇之間俊物在
前自起人意他日視鴛鴦視鷓鴣視鉞刀視稊稗未嘗
不心惡而切齒士之俊茂當十倍於此且以全蜀千里
詩書萬家導江岷峨之清子淵君公雖已死千百年中
佳氣未絕塵外奇特往往過眼持未有品題曰此龍駝
此瓊枝此南金此國寶此明堂材此清廟器此千里駒
而先後之容或無可借故琬琰之蒙棟幹之老殆不勝

乎一嘆恭惟閣下駕使者車澄清劍外名聲日新標度
益高主持風味以先士林掇拾豪傑盡令出我門下他
人手臂不敢輒相推助而特陽吹先飛冷灰士之貧賤
適丁是時且有妄想矣往年朝廷有經行之舉閣下取
樊生又取彭生皆窮山中人孑孑無謀僧者自是劉公
一紙書使人珍重愈不易得矣舊文二編為左右贄庶
按之餘俯賜觀覽去取在公某非敢望也

上徐提舉書

某聞太常廩樂工甚饒工意其饒也一占太常籍不異進士上第升絀遷罷至相慶弔亦自珍重其選往年籍闕吹笙者一人鼓瑟者一人擊鏞者一人大署太常門補其尤者諸工執其器以俟判丞晨入院延協律坐堂上俾工長厯試之吹笙者前為新宮為下調鼓瑟擊鏞者以次進如吹笙者曲未既工長訶之曰笙失之高瑟失之疾鏞失之濁時判丞協律議命盡去之無留而羣工惘惘於太常之門某伏念朝廷承平日久無大水火

無連年旱饑而力田之家膏血向衰衣食糜爛由是天
子遴簡使者順攷先帝成憲而以西南一道寄之閭下
閭下所至與人歎緻略去聲采不為形骸陞級之游使
妖狐不能容媚技鼠不能盡巧如是自能得士心裁結
後書以報天子必不晚也且日講法以求士士之急廩
延望屬藉者為不少矣其高其下其疾其徐其清其濁
其不合節奏者亦為不少矣某山中白面非能言時事
者今輒集舊所為文一編求試之閭下如有可收下管

雲簫揭為一聲求合節奏馬而後已不然亦將惘惘於
太常之門

上宇文修撰書

某生無有他好不知琴音射儀彈碁走馬有餘樂否於
古文亦不異世人好琴好射好彈碁走馬筮仕江源隣
閤下壤天意欲遂成其好也伏惟閤下論說古書樹成
一家含毫發輝陳言自去乃所願學於閤下者已數月
矣屬縻文法足不到門闌無端由廁賢賓從列聞閤下

音聲以洗簧耳解膠舌而蕩穢腸其不幸亦泯泯也舊
文一編為左右贄玉塵一揮請奉餘教

上張運判書

某狂妄竊謂閣下徘徊蜀道土風氣俗人之情偽盡知
之矣士賢不肖區處有方而塵外奇特搜抉獎薦絕無
遺漏蓋上以報明天子區區避擇之意下將流不竭之
澤於門戶此時直道挽起哀薄真無負於士類某也獲
為部吏謹守出納聲迹么麼自當泯默泥土中而當路

諸公主持風誼往往不先要援首拔寒素某又何苦自
褫精魄以幽獨為間夫竹頭木屑斂之似猥而敝冠雞
肋棄之可惜藥籠之寬兼收參朮之具清廟之祭不遺沼
沚之毛樊公漆梓為器在於他日李衡木奴餘利在其
子孫某之於公妄意在此伏惟閣下樂善忘勢推賢有
後陸機入洛初從閭里之俊游賈誼上書本亦少年之
故事今茲持節聲高士林如某何人竊窺下容欲曳裾
危榻以髣髴風流願備員一紙書以蘄脫去選曹庶就

異時萬里驅策之轡此其志也且貴戚書多而种暉猶與一孝廉興縣雖踈而徐寧尚列一吏部止水不搖冰鑑難欺在閤下屬意

上鄭樞相書

某元豐太學生居蜀荒陋聲迹伏匿陸沈州縣三十許年始以城役改官念初斂髣髴就父師之訓謂人才要在所養非其義一介取予不可苟於人非其道厚祿要資不可屑以就是吾父師之訓使之安於命而已漸通

書識理道浸更世故尚及見前輩所為乃知父兄之訓
不謬誤前輩之所為皆有道有命者也凡為宰執者率
前日臺閣中人為臺閣官由省府寺監中遷或由外諸
侯監司中召除平日經士夫點數有重譽四方想望其
風采一職之缺中外必曰某當得用某人乃宜已而果
然士風一變多歧捷徑千門萬戶炙手易以熱呼吸雷
風化枯涸於一瞬間不用刀圭騰井竈雞犬於霄漢於
是有挾寶玉古器書畫以進者有飾媵妾市歌僮舞女

以獻者有採花木竹石錦繡服用求充棟宇苑囿者分
建谿茶薦海南香盃酒通慙勤之權幽期達窈窕之區
可以締交子弟結好門客黃金賂信脂澤及奴婢媚
文侈頌贊詠功德便謂是周孔以上人餘子碌碌不足
數也復有偵刺事機逆射除目喜為耳目梟狗以愚弄
權貴大者鬪小者傷遂得志於其間巫醫卜祝玩其技
以進暮投錢乞活且與從官為伍黃冠武弁各自有門
生在昔一掛吏議振起無階賊淫敗身沒齒不錄矣於

今使有孔方子何病不為清流嗟乎士風至此極矣皆前輩所不肯為亦不忍為跂而眡之令人愧縮所謂義與道與命者果安在夫周之士也貴今朝廷貴士士不知自貴為時之羞且奈之何恭惟閣下丕業殊勲著在典冊重名夙德熟於華夏宰輔舊物所繫甚大時數前定鬼神不知惟是前輩所為獨有閣下爾進退出處過九鼎之重所立卓爾非八風能搖要之前輩人氣味自別某梗野從陂澤中來不識背向但時覘達官貴人清

揚皙面其間豈無前輩氣味者殆未親炙之天下有公
義奚可草草亟欲得一職任杖藜以歸俾廩人繼粟退
食無事雅歌擊缶以形容太平幸無資以進不驚暴得
富貴斷無顛危不祥之憂效古人晚食當肉安步當車
以養全其生是中自有樂地所業一編副書以贄用言
以求其志庶幾或收錄焉前輩之氣味盡在是矣

上孫運使書

某嘗謂喜射者藏良弓矢喜獵者蓄良鷹犬學兵相遇

則談兵好劍遇士則說劍彎而破鵠殼而中鵬若發大
寶藏不啻得千金其喜見於顏面此射者之志也鼻頭
出火耳後生風疾馳平澤中得一鹿如下一城東一狐
如俘一將愈於勲在銘鼎此獵者之志也凡守如是凡
攻如是茲穰苴語茲吳起孫武法至如摧堅擒敵處則
氣息振然往往失聲攘袂以起是談兵者之常也飛若
跳丸舞若流星溝上之會微吾項莊漢祖幾不免大抵
自右其術謂鎔錙千將變化若神裴旻之徒非其妙者

此說劍者之常也吾屬好文不若是之甚耶先後進相
援引因其一言以蒙譽於當世則豈持弓矢鷹犬之良
而真好文者十倍於喜射獵喜談兵說劍者然則古今
文士既不少盍為泯泯不遇猶飢麟餓騶脫皮毛以死
與螢腐同瘞者不知其幾何好其文與不好者又不知
其幾何也某竊自念有生二十九年窮無他舉日造俚
語以求售於時俗而數以此窮他日暴所為文於當路
者一得之以衙客曰西南士若斯人者未可量一得之

則絡之馬腰不復省視後日進見無半語之及蓋事有
向背理不相入殆未足怪恭惟閣下以文章據巍科以
譽望振風俗再將天子明命持節蜀道主盟善類以先
士林而車轍久勞幾環天下度所閱固多矣昔東都士
以書抵某且導之曰孫公有清裁以人物為意請持所
作章向獻於馬首時乎時乎往者不可究來者未可知
舊文一篇為左右贄雖小道或有可觀者焉

上胡運使書

某不佞往日讀書窮山槩觀古今治亂廢興之迹十年
一室千百年事蠅頭鬼名懣懣方寸間軒眉高談刷去
塵土便謂一日接貴人不卹等差左手持衣袂右手揮
松塵吐朝野利病出所著書要以驚怪入官二年始悟
所養芒髮不可施設如三日新婦鬱閉氣仰視一世貴
人十九器宇潭潭希言無色可望而畏啓齒問士不過
邑里姓氏所從來士人執板避席曰某卿某家子此外
吞屏不敢發貴人旦起坐堂偶賓從攷程案送歸迓來

有宴笑有行樂有歌舞俎豆之御有琴音射儀之好白
晝酢酬媿媿不窮夜火照眉已爛然困矣孤子之士貧
無牙頰獨庸翰墨關所長投貴人儿下真沙粒入滄溟
其相知無幾耳方今西北之患間作黃河之役不解法
令渙易財用未殷士人班班有能談治道者是人材可
以言語取而貴人不果賜間燕虎豹炳於犬馬鸞鳳炳
於燕雀足以藻繡治具光華聖旦是人材可以文學取
而貴人未遑議物外風氣猥入滓穢何時而拔此直某

所以為病也閤下三吳世家世世區處文武士持節入
蜀主持風會以先士林彊力大援不能贊一辭而西南
英特多出門下竊度閤下不以言語取則以文學取之
矣如此而某又何病焉舊獻所業已瀆清重一之謂甚
其可再乎

上楚朝議書

某不佞自聞閤下在東蜀時以嚴謹視事簿書獄訟大
舉其條細入無間有弊蠹處明者往往不察貴重者多

忽之俾前後苞掩以罔主司閤下一過眼即披抉其陰
翳窺窮其端倪使老姦夙惡汗脊慄股恍惚無人色引
服而不敢欺彼非不敢欺是真不能欺故州縣振懼銳
於從政未幾何而皇華之光徙按右蜀前日之任達矜
飾標宇捐去禮法務為清虛者曰楚公來寧修舉我職
事尸素敗我貪者約曰今而後妖言媚色不敢妄為欲
摩人之足舐人之痔畏楚公笑我夫為一道使者而部
吏無捐去禮法為清虛者弛廢程按為尸素者貪化為

廉巧不踰矩如是亦足矣某生二十有八年耳目有限
所見如此所聞如彼既又久畏風稜不敢輒竄名於僦
中欲借文字以自暴聲跡亦復已已幸閭下至公無心
不間賤微何苦閉氣鬱鬱不發如車中婦重念不久當
去求試為縣閣下曲有鄰愛足以成就如其人物可不
可其能官與不能閭下寄聰明於外某又何言

--	--	--	--	--	--	--	--

欽定四庫全書

跨鼇集卷二十四

宋 李新 撰

啓

謝龐機宜啓

負檄趨梓操觚渡瀘既叨開府之辟書又玷清秋之薦
墨吹噓言重推挽力多初求鳳毛忌諱不識再見眉宇
鄙吝自銷絕無先容題品已歸於月旦決有定議剡詞
不待於歲終審當承顏之餘肯借緩頰之助歆向未始

異論渾戎不妨清談方興九里之城俾效一夫之役謂
子貢肆無窮之辯能說大人致韓琬無不遇之言可題
客舍脫身選調結草恩闕此蓋某官智自天開學惟性
妙氣平以定語粹而文同門弟子之詠經勸大將軍之
薦士庭下過子鯉人已多其賢聲軍中立左車士或得
而快意取青箱之舊牒錄跛僂之賤名顧後日之曳
裾正曩遊之下士未遑報稱何啻感藏

謝循資啓

末路焚舟在茲一舉青雲附驥俄爾再遷錄蜀客之微
勞疏堯天之睿澤光生郤屋愧入汗顏伏念某學非無
師力弗逮命困值黜伯退編逋翁虛馳璧水之名誤玷
龍門之賞志荒求仕若倒挽於九牛老至為文近退飛
之六鷁碑顏沒字鼓腹無腸妄投北闕之書久作南冠
之繫罪將溢貫智不滿囊辱吾老子之龍文來自司空
之城旦三日新婦宜閉氣於車中百年枯桐輒揚聲於
爨下誓言投筆樂賦從軍會將命以恢疆許開府而求

士陳力就列不足使於前與趨事勸功有以賤為貴者
憐其勤匱試以劇難饋糧以供師行制器以前民用悉
稟坐帷之畫推而行之載加伏櫪之鞭與其進也直道
為屈讒言孔多終成貝錦之章逋肆燃灰之溺和戎自
絳草奏非湯削竹簡之春秋化雲天之雨露祐甫䟽內
八百吏無親舊之嫌子儀帳中六十人皆將相之舉靜
思濶遇端出腆恩此蓋某官學殖根深德機深湛獨運
潛神之計兼收闢國之功歷六詔之故封窮三代之荒

服不必解降王之縛益能得面內之心來則安之屢布
相如之檄召則行矣將造吉甫之歸某濫被薦論猥叨
升進拜細書之一札載厚賜於五雲媿在盧前重覩顏
於躡等請從隗始形雅意於好賢感無窮恩盡未來際

到任謝二走馬啓

仰奉除音外移使指上副聖人之欽恤俯慚器業之空
疎郭伋重來第見兒童之慕令威復至稍驚城郭之非
托庇云初量情備喜伏惟某官忠嘉許國直亮秉躬立

清準於朝端播徽聲於士論下車解衽方勞望履之思
拭目揚眉行有趨風之便

謝黃都大啟

埋輪當道不問狐狸爍火虧光何傷日月行迷途而不
返墮胥井以誰尤且法本貴於持平事或容於脫誤不
循三尺殆以私而勝公雖有二天肯轉禍而為福猖狂
固無大惡踈畧豈有他腸不平謂何或失而已告者過
也難明竊斧之疑問以辨之寧無投杼之感况摘山之

謀以強兵富國豈折腰之賤能隳事沮功擔無此心偶
褫其魄譬尹何之為邑未能操刀如揚干之亂行無所
逃命如某者才不周變學非適時因人而成為鬼所笑
屬同列之競進忌寸步之或前先張之弧又下之石內
自訟者何當嘔出肺肝人必知之盍亦有覩面目尚希
哀顧許以自新此蓋某官德浹神明性全忠厚垂惠於
不報推恩於無知矜其地寒與免吏對仰天呼救忍坐
視其困乎搖尾乞憐必有動於中者願引車而改轍不

忘終身將洗心而事公請自今日

謝改官啓

築斯城而鑿斯池蔑無勤績言如綸而出如綍誤玷優
恩念昔第功全歸化力及今祇命獨後衆人脫半生選
調之卑激百口愚衷之感竊以穴居避患巢木安棲天
造域以分疆王設險而保國折柳樊圃智未有餘丸泥
封關愚不可及國家閒暇常恢道德之威日月照臨絕
無內外之患曩置漳川於劍限實為右屬之喉襟豈其

雉堞之隳無復蛇形之壯總茲重任斷自宏規人心均
和天意甚悅獎詞溫厚謂可威於百蠻立制精詳固宜
垂之萬世實墉實壑非徒壯觀自西自東特為雄冠毛
錐子已投地上寧力之勞王先生雖在役中奚功之有
伏念某鈍不及事拙無取才初伸已知猶恥人役驟叨
換爵獲出污塗不因汗馬之勞尚得桑榆之景行三十
年之空限險阻備嘗過五百載之賢人推挽加進欲求
報德之所曷在他人之門此蓋某官高義薄雲至誠格

物易以事而難以說望之畏而即之溫括夫成城已懋
金湯之績君子蹈道能踈雨露之私致此公微亦獲陞
改毛遂惡因人成事齊人多以口得官是何永廢之流
如假再生之路生育長養惟父母喜于就任飲食教誨
約兒孫以盧為名庶不忘卯翼之恩姑以盡犬馬之報

到任謝劉夢臣啓

占星蜀部昔來何遲望氣關中今見恨晚將交一臂坐
闕十年實每懷於好音矧難離於朽木回雖不敏誤蒙

卓爾之稱板焉得剛初學浩然之養念在官均將母之
樂爰當時慕稽古之榮顧萱草以涕零指具茨而雲隔
雉介意以無匹雁孤飛而底哀操繆悠而弔戰場稟生
碩以事儒將河潤九里知未易於忘情鷓巢一枝幸有
餘於樂地固其求舊方賴作新恭惟某官以道為宗惟
刑之卹言可觀而行可法望之畏而即之溫忠臣必求
孝子之門大夫正行古人之事曩依函丈獲教書紳數
勤倒屣之迎嘗布順風之請世憐其困料黃祖不能容

彌衡士擇所歸主侍人何以為孔子未始見幾而作固當慕義而留儻因醴酒以置疑竟卷綬章而投劾

茂州到任謝啓

郡守承宣雖資輔佐雪山輕重不係去來越岷峨深入於不毛古松會強名之曰郡矧石紐大禹之所宅本冉駝西漢而後通貢賦無三品之金羈縻僅十州之獠虎狼充路橋閣緣雲隕石飛空冒險豈千金之子凌霄置戍當關宜一夫之雄在昔從戎迫令使敵書生事組豆

迺乘桴筏以迎降士林肅衣冠俾扣兵夫而問疾溺深
救至蒙河伯之不收病極更生無扁鵲而小愈言猶尚
在志不復來或叨誤恩誠出非意鬪驚濤猶過覆車之
轍視舊榻如不共天之讐楚些重招哀同濟有三閭之
作藥籠預備念此生成九折之醫所居而安何陋之有
恭惟某官清淨以治順異而行以堯事君與蜀為福歆
向父子考論議之同歸機雲弟兄見文章之相亞比從
下座誨以至言一塵不揚請舉安平之燧九河已潤更

濡枯涸之鱗

再謝循資啓

朶雲再上名玷囊封閱歲四遷恩歸臺府功亡可記感
不待言伏念某學迷聖徒愚自天性政事載飭以冒人
材沐猴而冠非法家流嘗忍議文之愧本儒者服絕無
稽古之榮書成蠹魚傳養癖疾老蘆鹽於太學程朱墨
以功曹多言數窮殆取投荒之謫強項不屈姑叅起廢
之遊時操毛錐務出月脇形第怖瘡氣將食牛而曹雖

類於郭尖無處可逃於鮑五識一丁字那勝挽於彊弓
相萬里侯豈容分於縱理日者辟士與之開疆獲請命
而與行非因人而借譽晉公幕下本求韓愈文章昆邪
奏中惟許李廣材氣大道最嫌揀擇至公不論孤寒伯
樂能空冀北之羣劉安盡化淮南之石燕公大手筆迭
回雨露之私太原小朝廷終許衣冠之盛受賞乃爾顧
德何堪此蓋某官克已於仁見幾以獨體賢者之蹈道
得哲夫而成城萬歲仆碑已極夜郎之地相如傳檄尚

虛邛笮之君圖書初總於道山雞犬亦遵於雲路致茲
鬼瑣荐被超陞凡畢循選人之階是誤乘君子之器侏
儒易飽爰增粟於一囊偃僂過恭式循墻於三命爪蠅
遽集水鏡肯搖既越等以叨恩敢興言而缺望感遇二
字願勒銘於山阿圖報一心不食言於河水

謝王廉訪築城畢工啓

修役事之至重不亦勞乎尅期會之太嚴非敢後也既
免隸官之責遂叨粹語之褒設險擬於金湯保民必先

城郭百年弗治一旦惟新墉壑高深樓櫓華煥五月而
息豈朽糞土之墻百堵皆興又復他山之石執爨朴而
從車右挾法式而問規程制而用之古未有也凡經台
視之過曲盡精微雖資人力之為深藏知巧而況書生
田野俗學童蒙頗疎拙無取才號遲鈍不及事焉知制
作在俎豆則嘗聞試使經營本斗筭何足算荐蒙驅策
復賜指蹤長裾化畚鍤之塵重趼困梯衝之舞暴身既
久宣力為多果有功而見知借餘論而不惜儻離選調

全出異恩此蓋伏遇某官德宇恢疎智機穎利以道自
任與物為春說使人而忘勞善用才而無棄非一夫成
百雉之制出片言愈九鼎之安致茲凡下之流最荷提
攜之重功名難際恐英公惡命薄之人富貴無忘推傳
說在版築之列誓言九泯圖報一生

賀王觀察到任啓

鳳歷推剛龜文顧左已諧禮上倍切懼愉稍移蜀使之
星迭拜周家之命雪山增重金馬開祥當易于請腰笏

之濱正李邕求識面之地念昔提文衡於漢上顧予執
賤事於禮闈肉眼未識貴人步吏固宜革帶蔡見鄂岳
曾晚學之莫知楓落吳江亦前人之誤聽別一閱世共
兩秃翁巴子國窮聞太史起滯留之歎河圖職妙謂劉
公知取予之方惟摘山市駿之謀實富國強兵之本肇
自神考精求偉人俾興至利之源待以不次之舉數政
之後奉法不虔比年以來為弊滋甚明珠異貝既交走
於貴權空籍給書又肆謾於公上於今所受任責不輕

必待先見之明乃救未流之弊雖望之在外終雅意於
本朝使宋璟居中肯容心於私謁莅事伊始著聲何高
載道之謠若碑落筆之觀如堵恭惟某官因時以出載
道而行才超世而非師學到古而自我擢從他部簡在
帝心烏衣馬糞之遊典刑具在西清延閣之邃几席久
虛佇聽受釐之恩端有追風之召某投荒遠裔臥疾餘
生未瞻雙鳥之飛初託九河之潤猶叨五斗粗明投劾
之幾止有一天斷無挾故之慮參承尚阻傾陷良深

謝謝轉運判官啓

初馳囊皂豈虞罪戾之加再服官箴猶起功名之念敬
仰陶成之賜敢忘湔拂之恩喜與幸并感非言盡伏念
某隴西末裔鼇嶺寒生素無倚馬之才夙負屠龍之學
再飛秋鷄繼捷春闈豈期躍冶之不祥遂失壽陵之故
步多言賈傅自取間疎挑戰李陵竟成囚虜狂圖至此
薄命奈何丹闕春風未信淄川之對山城夜月來觀梅
尉之碑反求諸身未為不過此蓋伏遇運判奉議先生

冰壺雅望水鏡清標絕代風流遠嗣東山之遊屐驚人
事業近追淝水之殊勲文采不羣已先明月詩篇獨到
何但澄江萃奕世之殊能作一時之偉望茂膺宸眷夙
董漕權千里運糧誰識帳中之心計九年足用人驚地
上之錢流顧惟鴛材實依鴛厦曩嘗披霧幸獲拜塵脫
畧崇高驟止循墻之走屏捐名分遽蒙倒屣之迎載聆
玉麈之談復侍獸樽之飲岸中陪燕清興固不凡接膝
論文幸遇亦何有曾是鸞棲之局倍叨龍坂之光喜溢

顏間祥生戶外某敢不俯勤官守仰法吏師佩穀熟之
遺風鑒韓城之舊訓暮年考績覲隨嚴助之計偕餘論
吹枯願借山公之啓事

李轉運判官遠迎啓

顯奉芝書榮持玉節凡叨臨莅倍切欣愉恭惟某官學
造淵微氣存剛大仰被聖神之眷深明道德之歸移孝
於忠處仁以義夔教胄子知學為賢士之關帝耕籍田
謂農乃天下之本久居妙選數近清光肯辭蜀道之難

益見雪山之重乃得御矣顧瞻接士之容其猶龍耶姑
候出關之氣某垂老不調至愚無知侶令綽以分曹參
韋嵩而決事畏風以遁未明投劾之幾慕義而留行即
望塵之拜

趙轉運判官遠迎啓

光膺宸命榮領使權方勞望履之思已聽畏途之戒伏
惟某官器資宏遠政術疏通深潛富國之謀丕著立朝
之績江淮轉漕大被劉晏之功巴蜀觀風行布相如之

檄既淵衷之簡在宜溫詔以逆歸某將命叨恩指期覲
德雖出坤維之遠幸分河潤之餘參奉匪遙欣愉尤切

謝張待制啓

不遠千里仰瞻少微之光無有二心恭受杏壇之誨與
適未可與立所見不逮所聞過勤倒屣之迎獲布順風
之請士皆驚目孰為來哉師獨解顏與其進也益丹鳳
于飛則率羣羽以皆集拔茅連茹則思引類以同升特
親玉塵之譚迭奉獸樽之飲燕公大手筆數窺翰墨之

飛太原小朝廷真見夜冠之盛伏念某小智易測大愚
不靈書成蠹魚傳養癖疾回雖不敏或可使於前與振
焉得剛宜有動於中者久閉其聲而弗出力尊所行以
為明身雖不容氣未稍下以寒蛙當兩部非爾所知謂
蓮花似六郎則余豈敢進值黯伯退呼漫郎彼臧氏焉
能使魯侯主侍人何以為孔子晉公幕下初求韓愈之
文章嚴武帳中惟縱杜陵之詩酒言叨望重恩辱已知
此蓋某官至論回天妙文華國得古人之大體樂天下

之英才不可親疎曷其簡易得季將軍諾詎肯易以千金掃曹相國門願首先於百執遽違鼎席還守版曹聽指日以造朝更甘心於執馭既多佩德良切馳情

賀秦州陸待制啓

伏審眷自宸衷進升內閣仰增慶抃恭惟某官清規奕世丕業動天紀綱華夷標準中外雖輕裘緩帶而氣蓋軍中能富國強兵而錢流地上曩嘗驅車蜀道誠由被器先朝豈惟獻摘山之謀固亦蘊安邊之術待時而動

以道自將賞士衡為龍駒未可量也推象先作人望惟
其有之况國朝方清玉門之氛而藩鎮實倚秦亭之重
甫睽西顧首頌異恩儼寶構之神區頤帝文之秘府茲
為華貫用賁精材綸言邇來柄任有日聞吉甫之北伐
式遄其歸想曹參之趨裝可立而待某拘文有限展慶
無由望台屏以展光與輿情而均躍

上宇文知郡啓

竊以義冠大袖氣概洋洋灑墨揮毫文章落落競就王

公之貴孰知道德之歸士習皆然余心患此豈知務師者託素絲之質慕道者先青佩之儀執晏子鞭金孤風之高邈為李膺御攀逸駕之崢嶸中圖益於見聞外豈徇於名勢如某者隴西冷族鼇嶺孤生滿羸無韋氏之金數尺之丘遲之錦功名難得憐青鬢之半蒼歲月易遷慮紅塵之暗老學欲為道仕期養親鬻珍豈免於胡盧故步殆成於匍匐少二頃之負郭闕百畝以躬耕聚斂成雷任懼俗訕刻鵠類鶩強齒俊遊難投足於我疆

遂竄身於隣境虎靴預謁屢升仲寶之堂牛鐸成音未
辱荀公之聽於是強編蕪累仰瀆聰明歛伯喈席者咸
謂異才遊于厚門者並稱名士觀海為水尤慙一勺之
微以筵撞鐘亦冀小鳴之便恭惟某人行安常性學出
真心道德尊時之英才業為衆之準音容和粹春生金
谷翠連天風骨精明冰透玉壺清滿腹吹噓後進黼黻
斯文伏乞比恕後夫誨加大匠一則俟振特之惠一則
祈開敏之私立指迷塗俾知聖域杏壇數仞斯時矜潔

已以求桃浪三春異日庶燒鱗而上

代賀許侍郎冬至啓

上圭揆影導萬彙以迎長寶冊書雲候一陽之初復恭
惟某官著龜大政柱石本朝儲精泰階峙器清廟日著
可大之業力培太平之基民人可瞻文武是憲凡四時
與合其序則百祿宜受于天更納繁禧以副注意某猥
被皇華而諭蜀阻依台屏以稱觴頌詠徒深文言罔旣

上章相公賀冬啓

土圭揆影導萬彙以迎長寶冊書雲候一陽之初復恭
惟某官質文全粹聲實保和道觀昭曠之原化執慘舒
之柄大熙庶績以為百工師時顯諸仁所謂萬世利臻
符瑞之衆至懋功德以兼隆式丁亞歲之辰宜受王明
之福某限拘蜀道阻覲台光仰被埏陶實深頌詠

與唐梓州賀冬啓

伏以明陽胥復瑞景迎長漢儀肅簪弁之賢堯歷謹星
躔之次伏惟某官才能許國謀議冠時早收雋彥之科

茂奮勲庸之美宜承履祐用對褒嘉指峻館以非遙述
慶悰而莫既數言瞻頌罄瀉奚殫

回唐梓州賀冬啓

伏以歷紀周正首三微而建統灰飛嶰竹冠六律以推
長道宜作德之休吉有自天之祐伏惟某官純誠格物
善政宜民早參書殿之游尚鬱虎符之寄清修迪吉已
諧道長之辰密勿論思佇有彙征之慶賓榮阻造頌懇
徒深

乾
坤
廣
輿
圖

欽定四庫全書

集部

跨鰲集卷

二十五至
三十

詳校官庶吉士臣陳若霖

侍讀臣孫球覆勘

謄錄監生臣龍齊耕

謄錄監生臣孫永治

欽定四庫全書

跨鼇集卷二十五

宋 李新 撰

啓

賀李都大加職啓

伏審修覲嚴宸對天威於咫尺疏榮祕局聯仙館之清
華賜服示於以庸躡資酬於不次併承異數益快羣情
伏惟某官識造淵微氣全剛大卓著人倫之表深明吏
道之端簡在上知總宣使指摘山而裕國用高值以空

敵資利擅坤維大集富强之效種來西極增威中外之
容登課甚優述職惟謹奉凝旒之肅穆頌品服之彰明
德稱懋官名收出信平陟道山之選實為儒者之亨賞
典再加朝纓知勸有功而悅式瞻四牡之來攬轡載驅
復見皇華之遣行聞召節別貫華途某逖聽俞音悵拘
遠職莫遂門墻之望空修竿牘之誠抃蹈滋深敷言難
盡

賀呂右司啓

十行拜命一節趨朝聖神至明忠義咸勸伏以嗣皇上
念積累罔輕太平念慈宮攬萬幾之勞思神考正六官
之意永惟天下之務悉摠文昌之司吏益冗而兵益驕
刑未清而禮未化蒼生疲力願輕戶部之徭游手逸居
欲正工曹之役弊既已救法非不更豈求治之過耶何
報効之遲也必願求助誰將閔予思得老成共期平治
既精僕射丞轄之選又慎尚書侍郎之官然而上承僕
射丞轄之權俾無過失下副尚書侍郎之事使不稽遲

中持華省之綱必在都公之任固宜遴擇首及忠良恭
惟某官熙寧諫臣元祐御史道知可直頭不為人而低
義實難輕仕非枉已以就吾幸未老弗敢愛身德固不
回只知憂國雖在西南萬里之遠而有中外一心之誠
宜簡在於宸衷遂彌綸於省闈民所望也僉曰宜哉某
聞教一隅依墻數仞未遂趨庭之慶已先賀厦之誠

賀周運判陞運副啓

伏審就膺成命進陟華資不移蜀使之星重賜周家之

節久親仁庇彌切懼棕伏深慶慰恭惟某官性天高爽
器局恢宏嘗居禮樂之司從容待問繼奉絲綸之語左
右轉輸美績登聞俞言僉允慮勤瓜代益增繡斧之光
華幸託寶鄰猶借江河之潤澤瞻依有素欣躍無涯

轉官謝賈安撫啓

比奉細書獲遷顯秩爰作新於八寶蒙均慶於萬芳草
芥賤微本遂一瓢之樂祿綸光被濫叨五品之榮進居
有限之官聯時冒非常之典禮退循僥倖積有黃緣此

蓋某官許國惟忠偃藩以武登高能賦下筆有神說禮
敦詩威自宣於塞外輕裘緩帶氣已蓋於軍中五月渡
瀘行通里閉二星在蜀良倚葭蓐眷言寵數之來望賴
親朋之助碧油紅旆尚阻遠於音塵毛穎陶泓畧修文
於竿牘

賀宋宏父遷都運啓

光膺宸命榮徙使權驩意胥同下情尤切登車在邇換
印云初陝右占天自覺台躔之近邠公去國宛聞歸市

之從載廢七月之詩未報三年之政計臺虛左裕國藉
才允屬能臣實重他部治四州節度之鎮未究所長給
六路諸侯之師正圖來效顧卿士以惟月曾郎官之應
星初承細劄之訓辭復領先公之舊物錢流地上素知
取予之方食足關中妙得將明之指恭惟某官性資明
偉器宇恢疎政嘗近民文已到古屈宋之作後世宜為
騷人宗卿雲之章在處當有靈物護念統臨之部曲有
流落之衣冠喜觀如縉之言欲邁曳裾之客取白而舍

皇甫湜恐卞急之無堪樂蕭而苦張九齡尚勁正之可
取儻許乘傳而諭蜀是為先國而後讐更蒙載客以入
秦亦欲完辭而歸趙雖聞道成佛同古人之事何後恭
前倨為識者之譏望舊瞻烏非謂有喬木止中乞食未
免為鄉人某逖聽前音悵拘下職莫遂門闌之慶空修
竿牘之誠抃蹈實深詞文難既

謝京畿都運啓

右某承尚書省劄子奉御筆令閣門引見上殿訖蒙恩

除前件差遣者幕府備負需頭剡薦清閒奉對獲瞻咫尺之顏渙汗疏恩叨被光華之選仰慙臨遣內省逾涯竊以士雖志於有為道固伸於知己見信未篤乞憐固難明月夜光反貽按劍高山流水或失知音至半塗而止者有之以一人而毀者多矣自非高誼孰振古風待遇以始終不倦之誠成就以今昔非常之遇責不聞於求備譽或幾於過情用以所長勉其不至豈特教誨飲食之事曲盡卵翼生成之恩曠世未聞於今獨見恭惟

盛德施及鯁生某也結約無奇顯愚有素蓋各言志曾
微平日之高談無所取材固絕青雲之素望徒以登龍
之舊每懷附驥之誠知遇攸深提撕加重西州帥幕已
玷揄揚外計賓筵復從辟召漫彈夙夜何補涓埃空羞
鼠技之多窮自是鉏刀之終鈍顧惟瘠曠方切驚惶豈
期一鷄之飛章遽有九重之論薦主知素厚帝席為前
惟言聽而計從故朝奏而暮召恭聞俞旨入對清光仰
承聖問之周詢實出公言之推重除書下逮罷使過優

分右蜀將漕之權付一路按臨之職資忠移孝固宜叱
馭而行激濁揚清敢怠登車之志重惟冗散不稱選掄
向匪提衡孰與為地此蓋伏遇某官公朝重器名世宗
工忠嘉上簡於帝心聞望久諧於輿論至誠樂育敦先
生長者之風登賢選能見君子成人之美圭璋特達金
石不渝故於遴鑒之公必盡維持之力致叨忝冒出自
薦揚某謹當祇奉詔條永肩趣操盡用平時之教誨庶
幾異日之功名雖慚國士之知敢事衆人之報

李運使遠迎啓

細書顯被淵意妙臨甄教育之師儒昇將明之使事聯
官有幸慕義滋深某官抱道而遊執經以守國子教三
德忘意外之言筌行人為一書待帳中之心計高風不
替見之猶龍後進所推喜於為御姑輟詩書之訓式分
宵旰之憂叱馭惟忠指山川之攸遠登車有志載禮樂
之光華試均陸海之饒逾見雪山之重孚仁言而格物
制國用以裕民春化筆端錢流地上成人小子自煩米

廩之漸磨長者先生願接龍門之清賞臨牋甚喜望烏
猶勞

謝趙運使啓

捧毛義檄已叨獎進之榮彈貢禹冠更切依歸之願與
適未可與立所見弗逮所聞屢勤倒屣之迎輒致順風
之請伏念某小智易測大愚弗靈敝帚千金立家四壁
並老萊於戲綵約伯直以躬耕再潔其身過舞雩之童
子三緘其口類周廟之金人俛為入幕之賓殊非稽古

之力曾吹竽而被賞又搖尾以乞憐一鬼在傍笑伯龍
之寒乞諸曹詢事知令綽之老成啓行元戎備負跛僂
愈風無檄覆瓿有書要所事者如晉公庶幾行道乃所
願則學孔子然後成師全叨異恩終出選調茲益恩主
運使龍圖先生性天超爽心地踈通長者先生禮樂盡
在是正人端士朝廷無易公念太史雖滯於周南然伯
樂已空於冀北尚容鈍吏不棄聳丞憐老馬而乞敝帷
招郢人而歌白雪試閱上公啓事疊著隴西土人傷弓

之禽姑求一飽而已副墨之子何取片言乎哉聲雖成
文言不盡意

到任謝兩府啟

叨被綸言獲將使指知恩所自撫已何堪伏念某政術
空疎性資凡近未能製錦幾廢於前功必學為箕每傷
於墜緒愚無一得巧致百窮辱記芻蕘之言誤置蘧蔭
之用儲囊錢而未置大官何優奉計書而復來末路多
躓偶從下列輒對清光初微尺寸之長得被西南之役

夢回江國數異日之連檣耳接巴音識當時之流馬况
爵祿馭海內之士惟弟兄受門下之知凡縻龜組之榮
盡出鑪錘之賜愚無述作莫紀象於太平遠有光華誠
曲私於造化恭惟某官盛名蓋世厚德承天玩心乎幾
微論道乎昭曠時惟神聖眷我父師斂時福以錫民體
大鈞之播物豈茲涼薄亦預使令姑成叱馭之忠驟夫
掃門之職思圖後效不知蜀道之難欣遂外遊第覺泰
階之遠

賀陳戶部移知東川啓

伏審光膺明命榮徙巨藩印換鄉邦風生井絡恭惟某
官學源深濬氣宇恢疎春生筆端言出塵表一室安能
自掃四座從而數驚蘭省舊遊視圖察乎耗息皇華遠
被攬轡志於澄清與時偕行而來者申也以道自重則
我且直之既從事以獨賢雖不容而何病外更雄服簡
在上心竹馬喜於再迎風俗為之一變江山不易父老
猶存下車修庠對文翁之善化登高能賦揖子昂之清

風某叨薦公朝幸隣德壤馳情每切趨慶未由

賀李待制移延安府啓

伏審就錫宸綸寵更帥節式重宿兵之地難辭渙汗之
恩幕府初開輿情胥慶恭惟某官胸藏武庫議訂石經
才應變而有餘功被知而逾顯關中足食已效陳陳之
相因堂上出奇良見多多而益辨矧茲重寄實賴壯猷
古稱北戶之防今控西戎之要亟謀良帥果用洪儒奕
世殊勲闢玉門之遠畧千齡盛際上金城之永圖在一

面之可當舉諸將而盡護忠孝兩得大闡乎家聲文武
兼資增崇於國勢行摠遠業入贊鈞樞某受知最深去
德滋久逃聞新命但欣大厦之成悵走遐方徒想高牙
之建

回唐梓州賀正啓

伏以一氣回元書重麟經之始三陽交泰卦符羲易之
亨禮盛古今慶通遐邇恭惟某官才包經濟德合表儀
重千古之高名擅三長之遠業暫分候服久報於政成

順布王春亟乘於道長逢辰惟吉與物開端前思宣室
之言即起潁川之召荐迎休應仰叶大來某欣對令時
計司攸職第缺修容之慶姑勤頌德之誠

謝舉官啓

行間登第顧何取於決科外邑效官均無聞於莅政誤
當論薦彌積戰兢反身雖榮分量太過且以澤雷洊震
特容尺蠖之伸驪尾將馳亦許蒼蠅之附世道不遠物
情大同而觀頤多失於舍龜故入林未免乎逐鹿苟亡

素養如羊質而虎皮更欲求官定麀頭而鼠目搖尾以
乞憐者皆是磨牙而肆毒者有之至使剗腸何如曳尾
與其吠客猶愈喪家果能緣木求魚無乃為蛇畫足况
鼯鼠每窮於五技而鷓鴣不過於一枝自足而然分定
故也何豹變然後見君子蓋雄飛謂之真丈夫雖惡居
翫肆之間誰致汝青雲之上未能奮擊祇益內慚如某
者翰音不登羽翮未振辰將安在天莫我開聞道同於
夏蟲適性幾乎野馬拚飛入洛已無馳譽之文俛首客

梁徒有倦遊之意技止此耳孰為來哉在陰之鶴未鳴
雄雞之尾先斷雉十步而一飲慮患固深螭六跪而二
螯寄身何所豈謂退飛之鷓得偕漸進之鴻偶登元禮
之門遂逃點額輒入衛公之好俄許乘軒載揣愚衷實
獲優幸此益伏遇某官妙語唾玉清才飲水一意教人
盡肖螟蛉之子片言取士不遺洛誦之孫致此顯蒙亦
荷提拔食臬以堪定知懷我好音樂鷄用鐘不至自貽
伊戚由是非池中物安能效轅下駒敢不慎守官箴益

堅素節誓言九泯懷報一生

謝舉官啓

腐儒學術世謂鮮通俗吏政經自知不敏誤承華剡益
載厚顏進退居榮俯仰驚寵竊以池塘生草曾回鄒子
之春宴寢凝香未報竇申之鵲方再濡於薦墨或崛起
於訟書顧白璧之無疵何青蠅之劇集緣同列競進忌
寸步或先張弧於前設羿在後引走卒於臥內推以腹
心挽使者於道旁獻之竿牘構成大獄肆為姦言若妖

狐得夜以祥是醜婦入廬為妬雖即宴安懷鳩操心益
危奈何笑語藏刀為患不細惟蝮蝎不知其毒如日月
何傷於明况愚幸有二天知告者過也如彼不循三尺
欲問以辨之殆未中其鼠機幾弗免於虎口求之正道
叔孫惡李斯俱官比之匪人老子與韓非同傳蒙轉禍
以為福惡以人而勝天謂能屈身池中當令出我門下
如臬者慮不周變才非適時因人而成為鬼所笑念故
人招隱言欲與汝偕亡屬藻鑑求賢安能使予不遇此

蓋伏遇某官直道遊世誠心與人不食前言每借餘論
憐其腰磬過乎三命循牆借之函書重於十部從事故
茲庸妄復與採收果能草牘三千未嘗軋思要當除吏
八百仍許備負感恩曷窮報德無易

謝席徽猷舉改官啓

懼使乎之辱命方俾來以獻圖既叨開府之辟書又玷
清秋之薦墨恩多數異感極涕零竊以物貴當時士伸
知己敢勤三接必有一長使人持不倦之誠在古稱非

常之遇然世有萬法而道無兩隆見彼是則此非欲前
軒而後輕器車幾於無用舞馬疑其不祥抱空桑以求
至音實枯腊而為真璞棄騏驎馭翻興長道之悲捨蘇
合丸迺取蠅螂之轉高山流水正待知音明月夜光易
貽按劍再遊瀘水一識荊州愧無蹈道之資辱委成城
之役雞鳴狗盜不足使於前與馬勃牛溲有以賤為貴
者某也愚自天性學無醇師粥飯僧無所建明牛馬走
不通問訊桑樞甕牖未嘗有顯者來簞食豆羹固不改

回也樂存蒙論薦難答寵私此蓋伏遇某官學植根深
德機淵湛獨運潛神之計兼收闢國之功邁蕭氏八葉
之傳類魏公三代之直薄海無不州縣通大夏豈邛竹
之商白首不見甲兵置蜀人於華胥之國方圖舊而共
政宜用夏以變夷何期譴薄之才獲與公忠之舉比居
下座屢獲解顏富貴無忘疑傳說在版築之列功名難
際恐英公惡薄命之人願殫犬馬之勞少報丘山之賜

謝种帥舉陞職啓

涇河水靜未暇濯纓周廟雲間方將吊古初息宵征之
馭正如痛定之人不待搖尾以乞憐甫見入門而問諱
亟從下座首薦公朝疑列子之適齊五漿先饋類淮陰
之拜將一軍皆驚比至西陲幸虛樂地輒後來之居上
不歷試於諸難號沒字碑徒有其表分士師鹿亦自無
心好辯虞卿再見而輕萬戶無情龍伯一釣而連六鼈
名利至於兩忘文武是或一道啟行碧鶴導引諸曹獨
自塾中遨遊諸將豈復溺冠之辱盍勞衷甲之憂故宜

謫薄之流或與公忠之舉此益某官簪纓華胄忠義大
閑模範願以為師風雨不改其度讀名將傳已知諸父
之賢占處士星猶識終南之隱本自魯服終愛褒衣藉
嘗用於白茅鳴必求於呦鹿堂上皆雅歌之奏入室無
雄雞之冠新豐酒寒孰舍馬周之賤漁陽慘陋第容欄
子之狂謹當恪守官箴益親函丈歸數宋人之券退求
寢丘之田海內文章半屬晉公之幕客朝端將相誰非
尚父之門生

欽定四庫全書

跨龍集卷二十六

宋 李新 撰

啟

賀蔡秘丞遷直閣啟

伏審榮被溫詞進升華貫伏深慶抃恭惟某官妙文旁
達至德敏修登蓬萊之三山總圖書之四部為可繼也
佩清訓於父兄是以似之追元勳於師相已見飛鴻之
漸敢先賀履之誠

賀王都護加留後啟

仰膺明命榮進重權夙接下風倍增殊喜伏惟某官立
名以武許國惟忠出奇無窮威已宣於塞外所向必克
氣每蓋於軍中比成青海之勳遠過燕然之績論功有
在推賞孰先凡茲留後之稱實報無前之勇兵書紬繹
更為異日之孫吳西土削平未下當時之頗牧無緣趨
賀第切馳情

代人與程侍晨啟

顯被渥恩真膺渙爵即正名於視品侍邃殿之清晨從
古所未嘗聞於今尤以為盛遙叨華貫喜倍衆人恭惟
某官道法自然化窮無始調一元之氣固成六虛之流
攝衆妙之門安行萬物之上遊心於淡易俗以淳曾參
紫府之朝元來輔繼天之教主公孫立辭數萬更開問
辯之方混元言道五千再見發明之旨且寶籙清虛之
地愈於仙山金門燕閒之濱是為德友數應崆峒之問
時參鴻蒙之遊方興不召之臣益見非常之德峻遷四

品密近三微侍清旦於冲和擬西清之華要朝夕納誨
闡微妙於域中雲漢為章副昭回於天上某久使蜀道
阻趨泰階終當望氣以來亦欲順風而請夫子之墻數
仞通籍良難壺丘之止九淵相形未可側聞新命欣見
除書未容一介之馳先拜五雲之賜占星在望共知鈞
穎之閒承寫有緣詎覺飛鳧之遠

謝席徽猷薦考察啟

光被絲綸徙平涼之重鎮戒嚴牙纛趣蜀道之輕裝自

持許國之心猶慮遺賢之嘆至於踈賤不忍棄捐愛及
陋儒亦叨薦墨况達官多在年少立朝率美風姿灼知
老子之癡頑不入時人之好尚某者鈍不及事愚為無
知孤寒伴北陸之水衰晚薄夕陽之景棲遲屬部偶占
北海之飛書流落窮邊未化丹駝之左社顧秉公舉獲
出污塗此盖某官聰明疏通簡嚴易直老成前輩忠義
大閑龔黃弟兄踵報近民之政淵雲翰墨親裁樂職之
詩仰觀題品之章半是西南之士致茲鬼瑣或荷甄收

方觀諸葛之安邊遽失仲宣之依庇

謝盧運使城畢薦舉啟

大役偶興念宣力多矣至公所薦惟有功得之眡等列
以增榮悴面顏而無忝借使巧宦弗容私求竊以祐甫
不避親舊之嫌祁奚率多內外之舉後人得以藉口取
士至於遺才令出莫從人恥為役有若寒蟬附木忽聞其
聲亦猶貧子市瓜先取其大如某者才不逮古學粗知
方粥飯僧無所建明牛馬走不通問訊桑樞甕牖未嘗

有顯者來簞食豆羹固不改回也樂荐被驅策何敢獨
賢冒暑雨而趨烏夷束章程而相雉堞懼使乎之辱命
効伴來以獻圖再捐朱墨之煩來治金湯之險執及朴
以從車右挾法式而侍台光盡除糞土之墻悉布他山
之石前古未有不日而成得寵若驚見知則說茲蓋伏
遇某官懿文旁達至德敏修深知取予之方久付將明
之旨錢流地上輪輸陸海之饒智出囊中裕足坤維之
富與人不求其備相士寧肯棄貧致此孱庸亦蒙提獎

頑金就器已安造化之爐朽木成文更借丹書之手

謝蒲提刑城畢薦舉啟

初更月評爭乞齒牙之重來就板築豈聞巖谷之空平
時誤採於虛名是役歷觀其任事惟蜀人絕無黨與在
賢者不可虛拘因故人之言較重輕宜半年之薦分先
後大道豈嫌揀擇至公不論孤寒未免為鄉人忘情詎
得非謂有喬木屬意可知數遺才指屈而未伸迫重權
筆閤而莫下念子貢指難析之辯足以說大人恐韓琬

發不遇之言終於題客舍律偶幸同於鄒子鵲初喜合
於竇申時不再來老之將至如某者學海涓水儒林弱
枝類鼯鼠五枝而窮在鷓鴣一枝亦足金湯設險拙無
運智之私竹帛第勞慚非稽古之力茲蓋伏遇某官惟
刑之恤以德為修澄清之志爰示於至公疏通之才能
戒於太察平持三尺折在片言非惟議獄以緩刑抑亦
推賢而揚善致茲愚昧亦被甄收既膺國士之知敢後
衆人之報

回唐修撰謝列薦啟

右某啟。睿旨旁敷，蓋重賢能之選。有司列薦，亦惟望實之求。伏以某官富有長材，夙膺妙簡。出司漕計，入佐宰司。暫屈遠猷，俯臨遐服。聲名籍甚，允為公論之歸。事業赫然，雅副歲成之考。敢圖謙挹，特貺緘題。感荷之私，敷陳罔既。

賀劉提舉轉官啟

帝佑皇圖，初靈承於珍物。賞延多士，欣顯奉於芝書。進

隆秩以增光贊懽悰而無已伏惟某官處仁以義移孝
於忠淑問如臯陶出拜維新之命事親若曾子歸稱難
老之觴方攬轡以澄清阻披雲而慶賀修文敢後馳係
良多

賀提學轉官啟

肇新制作欣八寶之告成申錫臣鄰合萬方而均慶惟
懋遷於峻秩寶贊喜於私悰伏惟某官至論回天妙文
華國氣存剛大識造精微仰被休光式表聖神之眷陶

成俊造深明道德之歸拜寵之初修文殊畧

回人賀轉官啟

築斯城而鑿斯池茂無勤績言如綸而出如綍誤玷優
恩脫半生選調之卑出十朋龜益之助未伸謝牘先辱
榮緘感佩之私敘述難既謹具啟復不宣

賀余少宰啟

制具白麻冊登亞宰惟生西海傾巖石之具瞻光列三
階見台躔之上應照臨之下鼓舞以欣恭惟某官道任

覺民德尊輔世不負所學自結上知肯茹吐於剛柔弗
磷緇於堅白直繩風憲素推烏府之嚴視草雲章猶記
金鑿之長處仁以義移孝於忠既遷左轄之崇又陟西
臺之峻登庸良弼倚重熙朝慮總四方寵殊百辟輔相
天地爰收補袞之功燮理陰陽曾旅嘉禾之命某誤叨
使事遠出坤維但馳賀厦之私尚阻掃門之役忻愉滋
切冒瀆居多

賀鄭太宰啟

惟帝注意首相真儒具欽四海之瞻寵列三微之顯制
麻敷告華夏懽呼恭惟某官學貫天人知周事物發道
原之昭曠斷國是於紛紜作新二學之衣冠充美一時
之禮樂顯仁藏用素高經濟之才論道經邦仰赴亨嘉
之會况今民物繁阜而又天人交通神霄臻享上之多
儀宣和奉游心之清燕惟此君臣之遇初無上下之交
是宜公朝爰登上輔所立卓爾望尹氏之巖巖燕處起
然獲周公之几几其遠使蜀道阻趨秦階不憚山川之

勞欲荅鑪錘之錫雲天靄靄冀少護於鈞衡公府潭潭
願無忘於草芥

賀趙招討平晏州啟

甲冑起戎有戰固非得已蠻夷猾夏不討無以示威雖
舞干能格於有苗非通道孰來於西旅方叔之征獫狁
高宗之伐鬼方四夷之遠弗賓三代之所不免蠢茲卜
漏擾我南陲口血未乾而背盟封壇甫成而入寇思峨
恃險敢堅狼子之野心阿永投誠如斷匈奴之右臂醜

類欲殄遊魂何之昏迷不恭抄掠未已奮天威之如震
舉廟算以無遺乃命侍臣實求儒將輕裘緩帶連帷幄
之良籌折馘執俘築鯨鯢之京觀斧鉞專乎閩外鼓角
鳴於地中授首萬人拓境千里雲梯火礮盡焚梟獍之
棲蒿矢木弓難禦貔貅之士破諸固若竹之迎刃平二
州如水之建瓴數路進兵常山之蛇擊首則尾至千夫
奪隘臨淮之法球左而右奔巢穴至於蕩空孽畜不可
勝計捷書報上喜分八彩之堯眉輿地開圖遠出九州

之禹貢古未之有後無以加伏惟某官深道明權以文
濟武大盈若缺成功不居將歸美於一人復推勞於諸
將富貴不改其度明哲以保其身六詔望風就公旦中
和之作八蠻落膽畏孔明擒縱之餘某夙遊恩闕初被
謗語叔孫求搆旗之任李勣惡薄命之人辰不再來聽
凱歌而不獲月聞三捷親汗馬以無因趨慶不遑馳誠
徒切

賀宇文叔通啟

西風落葉方興志士之悲塞草黃雲重卷胡塵之暗舉
單于才一郡之大命元戎啟十乘之行振宣皇威恭承
睿算弔十六州之生聚復漢衣冠掃二百年之妖氛闢
唐境土遘除重德出壯遠猷前席參帷幄之謀謨聚米
見山川之形勢智囊無盡才力有餘天寶先開時不可
失帳下得韓愈人已知其甚賢軍中立左車士或致而
相慶恭惟某官斷裁國論式著三言子房之知無名而
勇無功山甫之柔不茹而剛不吐將茂北庭之勒石已

成南國之甘棠行聽捷書實資妙畫朔風雖勁共飛太白之觴易水自寒更式荆軻之墓

代人湖州到任謝兩府啟

浮家四水初為習隱之謀出命九閭誤玷惟良之寄免寒塗之偃薄即官次之便安自為之謀不過如此伏念某材非大受學第小知少不自量冀亨塗之接武老而多難潔孤迹以投閒方且賦歸來于松菊之間詠招隱于雪月之夜躬營小隱以樂餘年歛奉誤恩俾臨舊治白骨再肉雖荷

生成于思復來豈無姍笑此蓋伏遇某官中興倚仗吾道
權衡不廢窮人知聾盲跛瘖之有用若作大厦須棟梁焚
燎之各安肆令寒谷之人上達細旃之聽蘋州花瀨散事于
燕游羽檄軍書第勤于警備

賀李侍郎啟

重膺溫詔復侍清光泰階增輝海寓稱慶伏深懼忤恭
惟某官元功翼世厚德承天聖神待之不輕中外倚以
為重侯藩出偃念吉甫之未歸輿情具瞻喜晉公之再

入謂不直則道莫見故至柔而動也剛蓋千頃汪波宜
挽之難濁惟一心事上則終以無嫌雅意乃在於本朝
彛鼎數銘於大節方孝文起代共欣泰道之交念周公
居東爭篋决剛之決况景星數見而少微尤明宜召還
於真儒仍畀予以舊物既三仕而無喜色爰一言乃可
興邦載開謀廟之初端見垂衣之治某夙依墻仞獲被
春溫退理青箱大愧為箕之學仰占鴻造曾成躍冶之
金無一夫不被利澤之時寶千載共逢亨嘉之會遠居

蜀道阻覲台光

賀宇文侍郎啟

伏審榮膺溫詔荐對清光增輝泰階垂福海宇恭惟某
官大節名世至誠動天夷險不移骨鯁終在六遊儒館
嘗肆筆而成書屢易藩符率五月而報政不負所學自
結上知遭時未容有黨方熾坐月堂以警思救宣室之
思賢所以歲序無多三經函谷奈何坐席未煖再徙山
東擇術幾於不同佩劔宜其相笑孝文起代離日中天

周公居東明夷出地時哉易失王曰還歸欲令國有望
人於是政咨故老況秋官司寇選畀重於他曹惟端士
正人俯仰可以居此故曰赦則勿赦庶幾刑期無刑已
聞侯霸之入朝必先寬令何為曹劌之請見尚欲以情
方躔天步之艱佇聽袞衣之補某夙依墻仞獲佩訓詞
第從造物之蔭柳生其肘不聞夫子之道茅塞乎中尚
遠台光益馳私志

席侍郎問侯啟

搖落窮秋棲遲邀徼屬白光之在望播輿論以攸歸陰
被寵麻伏深懷想恭惟某官清規夾世丕業亮天妙簡
淵衷仰參聖制卧鎮西南之輿獨分宵旰之憂刀夢伊
符雪山增重子淵上客方裁樂職之詩伯禽世家已報
近民之政竚聽衮衣之補載賡金鼎之調某邂逅披雲
徜徉入蜀飄風發發冀少護於鈞衡夏屋渠渠審無忘
於燕雀

穎昌高侍郎問候啟

上簡宸衷外勞侯服政通清淨道合保和伏深懼抃恭
惟某官德海清深性天全粹冰壺可鑑玉璞不雕萃忠
孝於一門并侯將者數世俾契敷於五教命作司徒生
申採此萬邦王之元舅既蕃宣而維翰還明哲以保身
民人所瞻文武是憲雖已書之竹帛功無與加姑更樹
之風聲善莫大此星移踐土地首豸龍妙眷老臣薄煩
卧鎮所幸生此王國豈久棄之諸侯式遙其歸可立而
待某曩依賢府辱薦公朝落落京華灼見承平之旦沉

沉蘭掖親聞正始之音出守小邦日遠賢德

代賀馮左丞啟

綸言誕布管轄榮升初登真儒允叶公議中外胥以為
慶人神至於交歡恭惟某官丕業亮天元功格物用明
於晦載道而行惟自結於上知宜不負於所學責明治
典資黼黻之文章入告嘉謀賴著龜於政事代綸言於
清禁斷國論於中臺輔弼疑丞已得夔龍之佐左右前
後更資周召之才某以便鄉邦誤將使指方忘難於蜀

道阻趨賀於秦階頌詠徒深敷陳固既

謝康朝議問婚啟

河出崑崙未越慶源之遠食前方丈乃收苦李之微豈
意下流獲攀華胄某女子薄諧禮則下堂畏保傅之嚴
令子素秉義方過庭知詩禮之訓前辱問名之庶綵敢
回納幣之多儀少寬合卷之剛辰正望過金之重諾告
祖考以咸喜卜龜筮而叶從仰聽鳳鳴大協英莖之聲
律行瞻玉潤喜陪王謝之衣冠

王守遠迎啟

光膺明命榮鎮巨藩竊隸庀庠實增懽抃恭惟某官性
天全粹德宇靜深約愷悌以宜民本中和而制行惟聖
上始封之地復先賢舊治之邦龍德正升棠陰猶在當
時父老能言孔鯉之趨庭後日羽書首見伯禽之報政
俗已歌於耒暮士方僎於作新久行難道之青天再叱
前驅於折阪藩垣屏翰仍歸白首之名郎規矩準繩如
理青氈之舊物某老既不調愚尤無知備奏記以從戎

曳長裾而入幕未明投劾行即望塵

賀趙機宜啟

郵傳捷布路載懽聲凡在統臨胥增欣抃竊惟軍尚密
合縱鬼神而莫窺師出有名驅雷霆而加震妙領從戎
之記優先入幕之賓參古司馬之用兵勸大將軍之薦
士庭下過子鯉人已知其甚賢軍中立左車士或得而
相慶晏夷蕩覆惟斷乃成瀘水周流無遠弗屆盡本謀
猷之助致茲勲烈之高恭惟某官大智閑閑小心翼翼

濟仁以義移孝於忠吏祈脫腕之文世貴愈風之檄量
國士之才器固已無雙論指蹤之功能宜居第一鞅韉
趨賀山川阻長

回何狀元啟

仲舒發三策不言道真西蜀第一人端自公始行白晝
而衣繡丁春日之載陽望舊國以暢然瞻飛鳥之爰止
山川動色廬井生光且鼎足立嶠已有上公之象而海
波熬素寶資冢宰之權士雖至貧強項不屈家自為壑

執經以遊神仙之迹可求鳳凰之棲猶在挺生俊傑冠
天下之英才間出真儒得古人之具體惟爾祖有通家
之舊念廼翁結同舍之懽里嘗聚於德星宅亦鄰於孟
子上堂拜母知玄齡有公輔之才與弟議兄許王勃是
文章之伯見童子或與其進於鄉黨似不能言共依祀
梓之林獲觀宗廟之器雖聞道成佛有先後之數而夜
光明月無左右之容射策決科既奉明庭之對微言與
義果虛乙夜之觀適當大比之年特倡羣公之首言旋

粉社阻具壺漿敦長者風先下五雲之教叩丈人行未
修三命之恭伏惟文縝狀元至論回天妙文華國以大
道答黃帝之問以碩學宗唐堯之文未有虞卿再見而
輕萬戶誰知公子一釣而連六鼉馬空北則羣無留良
鵬圖南而風斯在下高汜卿之閎閱繼水部之風流具
慶增驩定遲行於魯國故交借譽恐思用於趙人優遊
三山潤色六典芸香格外細觀未見之書柱史室中更
謹守藏之職其比離苦塊久絕簡書粥飯僧無所發明

牛馬走不通問訊桑樞甕牖未嘗有顯者來簞食豆羹
固不改回也樂免園冊在蝸殼廬空坐困詎堪病狂稍
解幸識李揆面偶居鄭公鄉夷夏知名尤倍老夫之喜
衣冠盛事豈惟吾黨之榮趨見未遑馳誠徒切

賀劉提舉生日啟

著成九數占吉筮於熊羆志在四方立桑弧於門屏重
覽德輝之盛式通禮慶之驩還祠先祺為具湯餅觴飛
椒桂共稱眉壽之長庭植芝蘭更數佩觴之秀太白儲

蜀山之錦繡石麟化江左之風流文在手以可名頂貫
犀而終貴何煩高戶曾是記環容坐烘堂笑林甫弄麈
之繆夜分取火無厲人似已之嫌方土圭迎日影之南
惟陽律候葶灰之動魏公如約昴宿開祥擁全五福之
名扶翊千齡之運降神維嶽載觀申伯之賢有命自天
潛叶尼丘之禱伏惟某官德動高厚孝通神明俾熾而
昌方興未艾推賢固宜有後愛老謂其近親以克事君
與顏更譽永錫難老等商丘四皓之年無有後艱極黃

閣三公之寵某拘文有自上壽無階祝詠實深敷陳因
既

賀成都鈐轄啟

仰奉渙恩榮膺重寄叨鄰有幸溢喜無涯伏惟鈐轄團
練德履純誠智謀宏遠俯參軍政實簡上心欣聞忠義
之勤載省言容之粹左貂貴近每依日月之光右蜀富
饒更挹岷峨之秀披雲未遂望寫徒深

--	--	--	--	--	--	--	--